



Broj: 07-07-792-02/05
Mostar, 21.11.2005. godine

Na osnovu člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine FBiH“ br. 13/04), člana 31, člana 37. stav (5) i člana 53. stav (2) Poslovnika o radu Regulatorne komisije za električnu energiju u Federaciji Bosne i Hercegovine („Službene novine FBiH“ br. 59/04), te člana 36. stav (6), člana 44. stav (2), člana 46. stav (3), člana 47, člana 48. stav (1) i člana 49. Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine FBiH“ br. 37/05) i Odluke FERK-a o provođenju prvog tarifnog postupka br. 07-07-745-07/05 od 08.11.2005. godine, rješavajući po zahtjevu za sticanje statusa umješača br. 07-02-600-05/12/05 od 15.11.2005. godine, br. 07-02-647-10/18/05 od 18.11.2005. godine i br. 07-02-769/23/05 od 18.11.2005. godine, podnosioca J.P. „Elektroprivreda Hrvatske zajednice Herceg Bosne“ d.d. Mostar, Regulatorna komisija za električnu energiju u FBiH – FERK je, na XVIII. redovnoj sjednici, održanoj u Mostaru dana 21.11.2005. godine, donijela slijedeći

ZAKLJUČAK

- I. Odobrava se zahtjev J.P. „Elektroprivreda Hrvatske zajednice Herceg Bosne“ d.d. Mostar za sticanje statusa umješača u prvom tarifnom postupku u formalnoj raspravi po zahtjevu za odobrenje kratkoročnih marginalnih troškova energije broj 07-02-600/12/05 od 12.09.2005. godine, u formalnoj raspravi po zahtjevu za odobrenje tarifa za djelatnost proizvodnje br. 07-02-647/18/05 od 01.10.2005. godine i u formalnoj raspravi po zahtjevima za odobrenje tarifa za djelatnosti distribucije br. 07-02-647/19/05 od 01.10.2005. godine i snabdijevanja br. 07-02-647/20/05 od 01.10.2005. godine, a za koje je na osnovu Zaključka FERK-a br. 05-07-745-05/05 od 08.11.2005. godine određeno da će se po navedenim zahtjevima dalje voditi jedinstveni postupak i provesti jedna formalna rasprava pod novim brojem protokola 07-02-769/23/05, podnesenim od strane J.P. „Elektroprivreda Bosne i Hercegovine“ d.d. Sarajevo.
- II. Umješač se uključuje u postupak formalne rasprave iz tačke I. ovog zaključka na dan stupanja na snagu ovog zaključka i u onom stanju u kojem ga zatiče prilikom stupanja u postupak.
- III. Umješaču iz tačke I. ovog zaključka dozvoljeno je učestvovati u formalnim raspravama, iznositi dokaze, primjedbe i argumente i pridržavati se postavljenih rokova. Voditelj postupka može ograničiti učestvovanje umješača, u slučajevima kada je to za dobrobit efikasnog



vođenja rasprave. Umješač ima i druga prava i obaveze u skladu sa odredbama Poslovnika o radu FERK-a i Pravilnika o javnim raspravama i rješavanju zahtjeva i žalbi FERK-a.

- IV. Ovaj zaključak stupa na snagu danom donošenja i objavljuje se na oglasnoj tabli i web stranici FERK-a.

O b r a z l o ž e n j e

Član 53. stav (2) Poslovnika o radu FERK-a propisuju da FERK može dodijeliti status umješača licu koje dokaže direktan interes za tarifni postupak, koji je različit općem javnom interesu, te da je umješaču omogućeno da učestvuje u postupku, svjedoči i zahtjeva informacije putem člana FERK-a ili voditelja postupka formalne rasprave. Članom 36. stav (6) Pravilnika o javnim raspravama i rješavanju zahtjeva i žalbi FERK-a umješaču je dozvoljeno da svoje podneske stranama dostavlja preko voditelj postupka. Članom 44. stav (2) istog Pravilnika određeno je da će FERK izmijeniti postupak formalne rasprave ukoliko je to potrebno kako bi se za dva postojeća elektroprivredna preduzeća ubrzao postupak po njihovom prvom zahtjevu za odobrenje tarifa u skladu sa FERK-ovim Pravilnikom za tarifnu metodologiju i tarifne postupke („Službene novine FBiH“ br.45/05). U skladu sa članom 46. stav (3) Pravilnika o javnim raspravama i rješavanju zahtjeva i žalbi FERK-a, kriterije za utvrđivanje prava i statusa umješača FERK određuje za svaki konkretan slučaj posebno, zavisno o okolnostima slučaja. Članom 47. istog Pravilnika propisan je način podnošenja zahtjeva za sticanje statusa umješača po isteku roka, kao i da ukoliko FERK odobri zahtjev za sticanje statusa umješača nakon isteka roka to neće odložiti ili usporiti raspored aktivnosti tokom postupka. Članom 48. stav (1) ovog Pravilnika je određeno da FERK o zahtjevu za priznanje statusa umješača odlučuje u roku od 15 dana od dana prijema zahtjeva u FERK, dok je članom 49. propisan način na koji je umješač ovlašten učestvovati u raspravi.

Odlukom FERK-a o provođenju prvog tarifnog postupka br. 07-07-745-07/05 od 08.11.2005. godine određeno je da status umješača u formalnoj raspravi može steći pravno ili fizičko lice pod uslovom da blagovremeno podnese zahtjev za sticanje statusa umješača, i da ispunjava kriterije: da ima direktan interes u postupku, koji je različit od općeg javnog interesa i da raspolaže podacima i činjenicama od značaja za formalnu raspravu u prvom tarifnom postupku koji se vodi pred FERK-om. FERK je putem Obavještenja za javnost o podnesenim zahtjevima za odobrenje tarifa od strane J.P. »Elektroprivreda Bosne i Hercegovine« d.d Sarajevo i održavanju formalnih rasprava, objavljenog u Dnevnom listu i Dnevnom avazu dana 09.11.2005. godine, odredio da zainteresirana lica svoje zahtjeve za sticanje statusa umješača mogu FERK-u podnijeti do 14.11. 2005. godine do 12.00. sati.

Dana 15.11.2005. godine, J.P. „Elektroprivreda Hrvatske zajednice Herceg Bosne“ d.d. Mostar podnijela je zahtjev za sticanje statusa umješača u formalnoj



raspravi u prvom tarifnom postupku koji je u FERK-u zaprimljen pod brojem 07-02-600-05/12/05, kojim je podnosilac zatražio sticanje statusa umješača u formalnoj raspravi u prvom tarifnom postupku po zahtjevu za odobrenje kratkoročnih marginalnih troškova energije podnesenim od strane J.P. „Elektroprivreda Bosne i Hercegovine“ d.d. Sarajevo. Dana 18.11.2005. godine J.P. „Elektroprivreda Hrvatske zajednice Herceg Bosne“ d.d. Mostar podnijela je zahtjeve za sticanje statusa umješača u formalnim raspravama u prvom tarifnom postupku koji su u FERK-u zaprimljeni pod brojem 07-02-647-10/18/05 i brojem 07-02-769/23/05 kojima je podnosilac zatražio sticanje statusa umješača u formalnoj raspravi u prvom tarifnom postupku po zahtjevu za odobrenje tarifa za djelatnost proizvodnje i u formalnoj raspravi u prvom tarifnom postupku po zahtjevu za odobrenje tarifa za djelatnosti distribucije i snabdijevanja, a svi podneseni od strane J.P. „Elektroprivreda Bosne i Hercegovine“ d.d. Sarajevo.

U navedenim zahtjevima, podnosilac je istakao da je veoma zainteresovan za tematiku podnesenih zahtjeva i da direktni interes za sticanje statusa umješača ne treba posebno dokazivati s obzirom da je njegova djelatnost proizvodnja, distribucija i snabdijevanje električnom energijom.

Rješavajući po zahtjevu za sticanje statusa umješača podnosilac u formalnoj raspravi po zahtjevu za odobrenje kratkoročnih marginalnih troškova energije, utvrđeno je da iznos kratkoročnih marginalnih troškova J.P. „Elektroprivreda Bosne i Hercegovine“ d.d. Sarajevo direktno utiče na iznos tarifa tarifnih kupaca J.P. „Elektroprivreda Hrvatske zajednice Herceg Bosne“ d.d. Mostar. FERK je imao u vidu odredbe članova 73. i 74. Pravilnika za tarifnu metodologiju i tarifne postupke FERK-a, kao i činjenicu da je J.P. „Elektroprivreda Bosne i Hercegovine“ d.d. Sarajevo, u skladu sa navedenim Pravilnikom, ponudilo određenu količinu električne energije J.P. „Elektroprivreda Hrvatske zajednice Herceg Bosne“ d.d. Mostar, koju je isti prihvatio, a čiju cijenu će odobriti FERK u prvom tarifnom postupku. Prilikom razmatranja zahtjeva za sticanje statusa umješača FERK je imao na umu i ciljeve koje pred njega postavlja Zakon o električnoj energiji („Službene novine FBiH“ br. 42/02, 24/05 i 38/05) vezanih za stvaranje jedinstvenog tržišta električne energije. FERK ocjenjuje da podnosilac zahtjeva J.P. „Elektroprivreda Hrvatske zajednice Herceg Bosne“ d.d. Mostar ima direktni interes za sticanje statusa umješača za djelatnost proizvodnje, distribucije i snabdijevanja upravo i radi uske povezanosti njegovog mogućeg uvoza električne energije naspram dodatnih količina električne energije koje je u prvom tarifnom postupku obavezno prihvatiti od strane J.P. „Elektroprivreda Bosne i Hercegovine“ d.d. Sarajevo.

Obzirom da je postupak formalne rasprave po podnesenom zahtjevu za odobrenje kratkoročnih marginalnih troškova energije, te postupak formalne rasprave po podnesenom zahtjevu za odobrenje tarifa za djelatnost proizvodnje, kao i postupak formalne rasprave po zahtjevima za odobrenje tarifa za djelatnosti distribucije i snabdijevanja električnom energijom u toku, FERK cijeni da naknadno učešće umješača u postupku može samo doprinjeti kvalitetu provođenja prvog početnog



tarifnog postupka, koji se provodi u prelaznom periodu u smislu odredbi Pravilnika za tarifnu metodologiju i tarifne postupke FERK-a i da neće imati negativan utjecaj na podnositelja zahtjeva J.P. „Elektroprivreda Bosne i Hercegovine“ d.d. Sarajevo, niti će uticati na odugovlačenje postupka, a uzimajući u obzir da je status umješača odobren van vremenskog roka za podnošenje istog.

Na osnovu prednjeg odlučeno je kao u dispozitivu ovog zaključka.

Predsjednik FERK-a
Risto Mandrapa ,dipl.ing.maš.